

**KARATE SAVEZ BOSNE I HERCEGOVINE
КАРАТЕ САВЕЗ БОСНЕ И ХЕРЦЕГОВИНЕ
KARATE SAVEZ BOSNE I HERCEGOVINE**



**DISCIPLINSKI PRAVILNIK
KARATE SAVEZA BOSNE i HERCEGOVINE**

Sarajevo, 08.10.2020. godine

Na osnovu čl. 29. Statuta karate Saveza Bosne i Hercegovine, Upravni odbor Karate saveza Bosne i Hercegovine, na svojoj 10. Sjednici, održanoj u Sarajevu, dana 09.06.2020. godine, usvojio je:

DISCIPLINSKI PRAVILNIK KARATE SAVEZA BOSNE i HERCEGOVINE

I OPŠTE ODREDBE

Član 1.

Disciplinskim pravilnikom (u daljem tekstu: Pravilnik) regulišu se disciplinski prekršaji, vaspitne i disciplinske mjere, lica koja ih mogu počinuti, lica na koja se mjere mogu primijeniti, postupak utvrđivanja učinjenog prekršaja, postupak i procedura utvrđivanja disciplinske odgovornosti i izricanje mjere, te žalbeni postupak.

Član 2.

Niko ne može biti kažnjen za prekršaj, koji prije nego što je učinjen, nije bio Pravilnikom određen kao prekršaj i za koje Pravilnikom nije bilo propisano kako će se kazniti onaj ko ga učini.

Član 3.

Svrha prekršajnog kažnjavanja jeste:

- Sprječavanje društveno štetnih djelatnosti,
- Sprječavanje učinioaca da ne čini prekršaje i njegovo prevaspitavanje,
- Vaspitan uticaj na druge da ne čine prekršaj,
- Uticaj na razvijanje sportskog i društvenog morala, te discipline članova KS BiH.

Član 4.

Prema odredbama ovog Pravilnika za učinjeni disciplinski prekršaj odgovaraju svi registrovani, evidentirani i pripadajući članovi Karate saveza Bosne i Hercegovine (u daljem tekstu: KS BiH), u statusu fizičkih ili pravnih lica, odnosno sportisti, stručni i sportski radnici, sportska karate udruženja (klubovi, sekcije, škole i dr.) i njihovi članovi i zvaničnici u svim situacijama nedoličnog, nesportskog, nestatutarnog, odnosno disciplinski odgovornog i kažnjivog ponašanja, bez obzira na mjesto i vrijeme njegovog izvršenja.

Član 5.

Disciplinski prekršaj je društveno štetno djelo, čija su obilježja određena ovim Pravilnikom, pa se, s obzirom na intezitet povrede zaštićenog dobra, dijele na teže i lakše disciplinske prekršaje.

Nije prekršaj ono djelo koje, iako sadrži obilježja prekršaja određena ovim Pravilnikom,

predstavlja neznatnu društvenu opasnost zbog malog značaja i zbog neznatnosti ili odsutnosti štetnih posljedica.

Član 6.

Krivična odgovornost, odnosno odgovornost za privredni prestup ili za prekršaj, ne isključuje odgovornost za povredu utvrđenu ovim Pravilnikom.

Član 7.

Učinitelj prekršaja je odgovoran samo kada je djelo učinio sa umišljajem ili iz nehata. Prekršaj je učinjen sa umišljajem kada je učinitelj bio svjestan svoga djela i htio njegovo izvršenje ili kada je bio svjestan da usljed njegovog činjenja ili nečinjenja može nastupiti zabranjena posljedica pa je pristao na njeno nastupanje.

Prekršaj je učinjen iz nehata kada je učinitelj bio svjestan da zabranjena posljedica može nastupiti, ali je olako držao da ona neće nastupiti ili da će je moći otkloniti ili kada nije bio svjestan mogućnosti nastupanja zabranjene posljedice, iako je prema okolnostima i svojim ličnim svojstvima bio dužan i mogao biti svjestan te mogućnosti.

Za pokušaj disciplinskog prekršaja počinitelj će se kazniti kao za dovršen prekršaj, a može se i blaže kazniti.

Član 8.

Nije disciplinski odgovorno lice koje je pogrešno uzelo da postoje okolnosti prema kojima bi, kada bi postojale, to djelo bilo dozvoljeno.

Član 9.

Nepoznavanje Disciplinskog pravilnika ne oslobađa prekršioce od odgovornosti.

Član 10.

Disciplinski prekršaj može biti izvršen činjenjem ili nečinjenjem.

Disciplinski prekršaj je izvršen nečinjenjem ako je učinitelj propustio da izvrši radnju koju je bio dužan izvršiti.

Član 11.

Disciplinski prekršaj je izvršen u vrijeme kada je učinitelj uradio radnju ili je bio dužan da uradi radnju, bez obzira kada je posljedica nastupila.

Član 12.

Disciplinski prekršaj je izvršen kako u mjestu gdje je učinitelj radio ili bio dužan da radi, tako i u mjestu gdje je nastupila posljedica.

Član 13.

Ko drugog sa umišljajem podstakne da učini disciplinski prekršaj kaznit će se kao da ga je sam učinio.

Član 14.

Ko drugom sa umišljajem pomogne u izvršenju disciplinskog prekršaja kaznit će se kao da ga je sam učinio, a može se i blaže kazniti.

Kao pomaganje smatra se naročito davanje savjeta ili uputstava kako da se izvrši disciplinski prekršaj, stavljanje na raspolaganje učiniocu sredstava za izvršenje disciplinskog prekršaja, uklanjanje prepreka za izvršenje disciplinskog prekršaja, unaprijed obećano prikrivanje disciplinskog prekršaja ili učinioca.

Član 15.

Podstrekač i pomagač disciplinski su odgovorni u granicama svoga umišljaja.

II DISCIPLINSKI PREKRŠAJI

Član 16.

Težim disciplinskim prekršajem utvrđuje se:

- namjerno i svjesno nepridržavanje i kršenje opštih akata KS BiH, sa težim posljedicama i većom društveno - sportskom opasnošću,
- učinjena krivična djela u sportu i van njega,
- Izrazito nespportsko ponašanje članova KS BiH, takmičara, trenera, vođa ekipa, klubova i klupskih zvaničnika, selektora-trenera, ispitivača, članova organa i radnih tijela Saveza, tehničkog organizatora takmičenja, delegata, sudija, zvaničnika Saveza, i drugih članova Saveza uključenih u organizaciju takmičenja i drugih sportskih i stručnih aktivnosti Saveza, sa težim posljedicama i većom društveno - sportskom opasnošću,
- neizvršavanje redovnih finansijskih obaveza i neizmirenje novčanih dugovanja prema Savezu, neplaćanje novčanih kazni i dr.
- onemogućavanje ili ometanje rada i odlučivanja organa KS BiH,
- javno iznošenje neistina o radu KS BiH, njegovih organa i tijela i njihovih članova, usmeno i pismeno, putem štampanih i elektronskih medija, društvenih mreža i drugih oblika društvenih komunikacija,
- podrivanje ugleda, razbijanje i rušenje KS BiH,
- onemogućavanje razvoja karate sporta, reprezentacije, prezentacije KS BiH u Evropi i svijetu,
- neopravdano onemogućavanje nastupa takmičara u reprezentaciji BiH,
- Stručno vođenje reprezentacije, reprezentativaca i ekipa, na zvaničnim međunarodnim WKF takmičenjima od strane neakreditovanih lica i/ili, od strane KS BiH, neovlaštenih lica,
- svjesno uticanje člana organa sportskog karate udruženja da se donese odluka koja je u suprotnosti sa opštim aktima KS BiH,
- narušavanje principa udruživanja, prava i obaveza udruženih entitetskih saveza i njihovih članova, kao kolektivnih članova KS BiH,
- udruživanje članova KS BiH u statusu fizičkih ili pravnih lica, sportista, stručnih i sportskih radnika i sportskih karate

- udruženja izvan Statutom regulisanih oblika organizovanja, bez prethodne saglasnosti nadležnih organa KS BiH,
- svaka povreda amaterizma protivna odredbama usvojenih opštih akata KS BiH, Sportskog saveza i Olimpijskog komiteta BiH,
 - falsifikovanje normativnih akata, službenih dokumenata i odluka KS BiH, kao i dokumenata, sertifikata i rezultata stručnih radnika i takmičara,
 - ometanje sprovođenja i nesprovođenje izrade i donošenja Kalendara aktivnosti KS BiH, planova i programa rada organa i radnih tijela KS BiH i selektora-trenera, te takmičenja, stručnih i reprezentativnih aktivnosti, koje su utvrđene Kalendarom aktivnosti KS BiH,
 - nepravilna nastupanja: omogućavanje i učešće na takmičenjima lica koja prema propozicijama, opštim aktima ili odlukama organa KS BiH i entitetskih saveza nemaju pravo učešća; neopravdano nastupanje prijavljenog takmičara; nastupanje na takmičenju sa neispravnom dokumentacijom ili bez nje; prijava takmičara u nepripadajuću starosnu dob ili težinsku kategoriju,
 - propuštanje delegata KS BiH da na takmičenju preduzme mjere u cilju obezbjeđenja uslova za normalno održavanje takmičenja,
 - prouzrokovanje prekida takmičenja,
 - svjesno činjenje povrede materijalnih pravila suđenja od strane sudije u vršenju sudijske funkcije na takmičenju, svjesno i očito nefer suđenje-navijanje,
 - diskriminacija i ispoljavanje mržnje po nacionalnoj, rasnoj i vjerskoj osnovi,
 - upotreba dopinga,
 - Fizički napad na drugo i/ili druga lica sa nanošenjem lakših i težih tjelesnih povreda,
 - Izazivanje tuče i/ili učestvovanje u tuči. Nužna odbrana/samoodbrana se ne smatra disciplinskim prekršajem,
 - teške uvrede i/ili klevete,
 - ponovljeni lakši prekršaji.

Član 17.

Lakšim disciplinskim prekršajem smatra se :

- nepridržavanje akata KS BiH, što ne izaziva veću štetu, niti ima veću društveno - sportsku opasnost,
- povreda načela javnosti rada KS BiH,
- nepružanje saradnje selektoru-treneru reprezentacije KS BiH,
- neopravdano neodazivanje sportiste na poziv selektora-trenera reprezentacije,
- nepridržavanje odredaba poslovnika o radu KS BiH,
- otkazivanje prihvaćene organizacije takmičenja u roku kraćem do trideset dana, bez opravdanih razloga,
- neispunjavanje propisanih uslova organizacije takmičenja utvrđene Takmičarskim pravilnikom i zahtjevom Takmičarske komisije,
- propuštanje tehničkog organizatora i organizatora da na vrijeme obavijeste učesnike takmičenja o mjestu, vremenu i uslovima takmičenja,
- neopravdano napuštanje takmičenja,
- propuštanje tehničkog organizatora da se pridržava utvrđenih i propisanih uslova

- takmičenja,
- nevođenje propisane dokumentacije na takmičenju,
 - nesportsko ponašanje članova KS BiH, takmičara, trenera, vođa ekipa, klubova i klupskih zvaničnika, selektora-trenera, ispitivača, članova organa i radnih tijela Saveza, tehničkog organizatora takmičenja, delegata, sudija, zvaničnika Saveza, i drugih lica Saveza uključenih u organizaciju takmičenja i drugih sportskih i stručnih aktivnosti Saveza, bez težih posljedica i sa malom društveno-sportskom opasnošću,
 - ometanje rada službenih lica od strane učesnika takmičenja,
 - neobjavljivanje biltena takmičenja od strane delegata takmičenja u roku od jednog do tri dana od završetka takmičenja, kao i nepodnošenje izvještaja delegata, ljekara, vrhovnog sudije, sportskog direktora i kancelarije saveza (finansijski izvještaj) sa takmičenja i nedostavljanje žrijebnih listi takmičenja od strane delegata kancelariji Saveza u roku do sedam dana od završetka takmičenja,
 - kada ovlašteno lice na takmičenju omogući da sudi lice koje se ne nalazi na listi licenciranih sudija KS BiH ili nije delegirano kao sudija za to takmičenje ili ne zadovoljava druge uslove za suđenje,
 - sudija koji propusti da se odazove ili pak u propisanom roku ne otkaže učešće na takmičenju za koji je delegiran kao sudija,
 - sudija koji se na takmičenju ponaša na način kojim narušava ugled karate sporta,
 - trener koji svojim nedoličnim ponašanjem podstiče takmičare na nesportsko ponašanje,
 - ispitivač za zvanja koji održi polaganje bez saglasnosti nadležne komisije, trener, odnosno ispitivač koji održi ispit za zvanja a da nema važeću licencu,
 - organi KS BiH, članovi tih organa i druga odgovorna lica koja propuste da preduzmu mjere na sprječavanju činjenja disciplinskih prekršaja ili po saznanju o izvršenom disciplinskom prekršaju propuste podnijeti prijavu Disciplinskoj komisiji.
 - nesportsko ponašanje članova KS BiH, takmičara, trenera, vođa ekipa, klubova i klupskih zvaničnika, selektora-trenera, ispitivača, članova organa i radnih tijela Saveza, tehničkog organizatora takmičenja, delegata, sudija, zvaničnika Saveza, i drugih članova Saveza uključenih u organizaciju takmičenja i drugih sportskih i stručnih aktivnosti Saveza, sa lakšim posljedicama i manjom društveno - sportskom opasnošću,
 - lakše uvrede i/ili klevete
 - lakši oblici diskriminacije.

III DISCIPLINSKE MJERE

Član 18.

Učiniocima disciplinskog prekršaja mogu se izreći ove kazne:

1. Opomena
2. Ukor
4. Novčana kazna

5. Zabrana nastupanja
6. Zabrana organizovanja takmičenja
7. Zabrana vršenja funkcije
8. Zabrana nastupanja na svim stepenima takmičenja

Član 19.

Disciplinski organi mogu, na osnovu odredbi ovog Pravilnika, prema svim prekršiocima ovog Pravilnika, izreći sljedeće vaspitne mjere,

1. Opomenu
2. Ukor
3. Posljednju opomenu

Posljednja opomena, kao vaspitna mjera, nije uslovljena prethodnim postojanjem drugih vaspitnih mjera.

Član 20.

Disciplinski organi KS BiH mogu izreći, na osnovu odredbi ovog Pravilnika, sljedeće disciplinske mjere:

Za lakše disciplinske prekršaje

a) Prema takmičarima:

- opomena,
- ukor,
- novčana kazna u iznosu od 100 - 300 KM,
- zabrana nastupanja do šest mjeseci,
- zabrana nastupanja od šest mjeseci do jednu godinu.

b) Prema sudijama, delegatima, trenerima, selektorima-trenerima i ispitivačima:

- opomena,
- ukor,
- novčana kazna u iznosu od 100 - 300 KM,
- zabrana vršenja funkcije sudije, delegata, trenera, selektora-trenera, ispitivača u trajanju do šest mjeseci,
- zabrana vršenja funkcije sudije, delegata, trenera, selektora-trenera, ispitivača u trajanju od šest mjeseci do jednu godinu.

c) Prema članovima organa i radnih tijela Saveza:

- opomena,
- ukor,
- novčana kazna u iznosu od 100 - 300 KM,
- zabrana vršenja dužnosti na kojoj je izvršio prekršaj do šest mjeseci,

-zabrana vršenja dužnosti na kojoj je izvršio prekršaj od šest mjeseci do jednu godinu.

d) Prema sportskim karate udruženjima:

- opomena,
- ukor,
- novčana kazna u iznosu od 200 - 500 KM,
- zabrana nastupa na jednom ili dva državna prvenstva,
- zabrana organizovanja takmičenja na domaćem terenu u trajanju od šest mjeseci do godinu dana.

Za teže disciplinske prekršaje

a) Prema takmičarima:

- novčana kazna u iznosu od 500 - 1000 KM,
- zabrana nastupanja od jedne do dvije godine,
- zabrana nastupanja i vršenja svih funkcija u KS BiH od jedne do dvije godine,
- doživotna diskvalifikacija.

b) Prema sudijama, delegatima, trenerima, selektorima-trenerima i ispitivačima:

- novčana kazna u iznosu od 500 - 1000 KM,
- zabrana vršenja funkcije sudije, delegata, trenera, selektora-trenera, ispitivača u trajanju od jedne do dvije godine,
- zabrana vršenja svih funkcija u KS BiH od jedne do dvije godine,
- trajna zabrana vršenja svih funkcija u KS BiH.

c) Prema članovima organa i radnih tijela Saveza:

- novčana kazna u iznosu od 500 - 1000 KM,
- zabrana vršenja funkcije na kojoj je učinjen prekršaj od jedne do dvije godine,
- zabrana vršenja svih funkcija u KS BiH od jedne do dvije godine,
- trajna zabrana vršenja svih funkcija u KS BiH.

d) Prema sportskim karate udruženjima:

- novčana kazna u iznosu od 1000 - 2000 KM,
- zabrana nastupanja na državnim prvenstvima od jedne do dvije godine,
- zabrana nastupanja na svim stepenima takmičenja od jedne do dvije godine,
- zabrana takmičenja i organizovanja takmičenja na svom terenu od dvije do tri godine.

IV ODMJERAVANJE KAZNE

Član 21.

Za određeni disciplinski prekršaj Disciplinska komisija će odmjeriti kaznu u granicama

koje su ovim Pravilnikom utvrđene, uzimajući u obzir sve okolnosti koje utiču da kazna bude veća ili manja, a naročito stepen disciplinske odgovornosti, pobude iz kojih je disciplinski prekršaj učinjen, jačinu povrede zaštićenog dobra, okolnosti pod kojima je prekršaj učinjen, ranije ponašanje, lične prilike, držanje učinioca poslije učinjenog disciplinskog prekršaja.

Pri odmjeravanju novčane kazne Disciplinska komisija će uzeti u obzir imovno stanje učinioca.

Član 22.

Pri odmjeravanju kazne disciplinska komisija će posebno uzeti u obzir da li je učinilac ranije disciplinski kažnjavan, da li je raniji disciplinski prekršaj istovjetan, da li su oba disciplinska prekršaja učinjena iz istih pobuda i koliko je vremena proteklo od ranije disciplinske mjere ili kazne.

Član 23.

Ako je učinilac jednom radnjom učinio više disciplinskih prekršaja, ili ako je sa više radnji učinio više disciplinskih prekršaja, disciplinska komisija će predhodno utvrditi kazne za svaki disciplinski prekršaj, pa će u pogledu izricanja glavne kazne postupiti na sljedeći način:

1. ako je za neki disciplinski prekršaj u sticanju utvrdio novčanu kaznu a za drugi disciplinski prekršaj neku drugu disciplinsku mjeru, izreći će pored disciplinske mjere i novčanu kaznu,
2. ako je za disciplinske prekršaje u sticanju utvrdio novčane kazne izreći će jednu novčanu kaznu koja ne smije preći zbir utvrđenih kazni.

V DISCIPLINSKI ORGANI

Član 24.

Disciplinska komisija je radno tijelo Upravnog odbora (u daljem tekstu: UO) KS BiH, koje se sastoji od pet članova, uključujući predsjednika, od toga tri iz Karate saveza Federacije BiH i dva iz Karate saveza Republike Srpske.

Radom Disciplinske komisije rukovodi predsjednik.

Odluku o žalbi na odluku Disciplinske komisije KS BiH, donosi UO KS BiH.

Po žalbama na odluke UO, sve sportske sporove rješava Sportska arbitraža.

U slučaju da Sportska arbitraža donese odluku koja nije u saglasnosti sa opštim aktima Saveza, ili protivno istim, konačnu odluku donijeće Skupština Saveza.

VI DISCIPLINSKI POSTUPAK

A) PRVOSTEPENI POSTUPAK

1. Pokretanje postupka

Član 25.

Disciplinska komisija KS BiH, pridržavajući se odredaba ovog Pravilnika, pokreće disciplinski postupak po službenoj dužnosti, na osnovu izvještaja delegata takmičenja, UO KS BiH, drugog organa KS BiH ili radnog tijela UO ili na osnovu zahtjeva svakog fizičkog ili pravnog lica.

Član 26.

Disciplinska komisija je ovlašćena da donese odluku da nije nadležna za konkretni slučaj, ukoliko utvrdi da se u konkretnom slučaju ne radi o prekršaju iz ovoga Pravilnika.

Član 27.

Ukoliko Disciplinska komisija nađe da nema mjesta pokretanju disciplinskog postupka po podnijetom zahtjevu za pokretanje postupka, zahtjev se odbacuje i o tome se obavještava podnosilac, koji na tu odluku ima pravo žalbe UO KS BiH u roku od osam dana od dana prijema odluke.

Zahtjev za pokretanje postupka se odbacuje ako je nastupila zastarjelost progona, ako su navodi netačni - lažni i ako se odnosi na radnju koja ovim Pravilnikom nije predviđena kao prekršaj.

2. Suspenzija

Član 28.

Suspenziju za teže disciplinske prekršaje, kao i za prekršaje na takmičenjima u organizaciji KS BiH, koji se mogu pripisati tehničkom organizatoru takmičenja, službenim licima takmičenja, predstavnicima klubova, klubovima, trenerima, funkcionerima Saveza ili takmičarima, izriče UO KS BiH, a na samom takmičenju delegat KS BiH.

Suspenzija može biti:

- a) automatska,
- b) na osnovu odluke UO KS BiH, Disciplinske komisije i delegate takmičenja.

Automatska suspenzija nastupa kada je takmičar, član ekipe ili ekipa dobio/dobila kaznu shikaku i isključen/isključena sa takmičenja. Protiv istih automatski se pokreće i disciplinski postupak.

Po izrečenoj suspenziji, organ ili lice koje je izreklo suspenziju, dužan/dužno je, u roku od tri dana, Disciplinskoj komisiji dostaviti odluku o suspenziji, dok je Disciplinska

komisija dužna, u roku do trideset dana od dana prijema odluke, pokrenuti disciplinski postupak, a konačnu Odluku donijeti u roku do šezdeset dana od dana prijema odluke.

Suspenzija traje do donošenja konačne odluke Disciplinske komisije.

Vrijeme provedeno pod suspenzijom uračunava se u kaznu.

Žalba na odluku o suspenziji ne zadržava izvršenje odluke o suspenziji.

3. Dostavljanje zahtjeva za pokretanje postupka

Član 29.

Disciplinski postupak počinje da se vodi dostavljanjem zahtjeva za pokretanje disciplinskog postupka licu ili sportskom karate udruženju protiv kojih je ovim zahtjevom predloženo pokretanje disciplinskog postupka.

Član 30.

Zahtjev za pokretanje disciplinskog postupka dostavlja licu ili sportskom karate udruženju protiv koje se pokreće postupak predsjednik Disciplinske komisije, vodeći računa da do preduzimanja sljedeće radnje u postupku protekne najmanje osam dana.

Član 31.

Lice ili sportsko karate udruženje protiv kojih je pokrenut postupak imaju pravo i obavezu da u roku od osam dana od dana prijema zahtjeva za pokretanje postupka dostave Disciplinskoj komisiji pismenu izjavu o navodima iz zahtjeva za pokretanje postupka.

Pouka o ovom pravu i o obavezi dostavlja se uz zahtjev za pokretanje postupka.

Član 32.

Zahtjev za pokretanje postupka sa poukom o pravu i obavezi odgovara na zahtjev dostavlja se licu ili sportskom karate udruženju protiv kojih je pokrenut postupak, putem pošte sa povratnicom.

U slučaju odbijanja prijema ili u slučaju kada postaji opravdana faktička nemogućnost uručjenja zahtjeva isti se ističe na oglasnoj tabli KS BiH, s tim što se po isteku roka od osam dana smatra da je dostavljanje izvršeno.

4. Utvrđivanje disciplinske odgovornosti

Član 33.

Disciplinska komisija KS BiH utvrđuje disciplinsku odgovornost iz svoje nadležnosti na javnim sjednicama na osnovu navoda iz zahtjeva, pismene izjave lica ili sportskog karate udruženja protiv koga se vodi postupak, izjava svjedoka, vještaka, drugih učesnika postupka, usmenih izjava lica ili predsjednika sportskog karate udruženja protiv kojih se vodi postupak ili njihovih punomoćnika ili zastupnika i na osnovu drugih, po potrebi izvedenih, dokaza, a u skladu sa Zakonom i odredbama ovog Pravilnika.

Član 34.

Mjesto, datum i vrijeme održavanja sastanaka Disciplinske komisije određuje predsjednik Disciplinske komisije, uz predhodne konsultacije sa članovima Komisije.

Predsjednik Disciplinske komisije, preko kancelarije, upućuje članovima Komisije pismeni poziv za sjednicu, sa mjestom, datumom i vremenom održavanja sjednice, te dnevnim redom.

Član 35.

Sjednicama Disciplinske komisije rukovodi predsjednik Disciplinske komisije.

Dužnost je predsjednika i članova Komisije da se staraju da se u toku razmatranja postupka na sjednici iznesu sve odlučujuće činjenice, izvedu ili dopune dokazi i da se daju razrješenja važna za odluku o odgovornosti.

Član 36.

Prije donošenja odluke Disciplinska komisija mora pribaviti pismenu izjavu lica ili sportskog karate udruženja protiv kojih je pokrenut postupak.

Disciplinska komisija može, kada to zahtijeva tok postupka i potrebe tačnog utvrđivanja činjeničnog stanja, na svojoj sjednici na zapisnik saslušati lice protiv kojeg se vodi postupak, odnosno predstavnika sportskog karate udruženja protiv koga se vodi postupak ili njihovog punomoćnika odnosno zastupnika. U tom slučaju i lice koje je u zapisnik dalo izjavu potpisuje zapisnik.

Ukoliko uredno pozvano lice ne pristupi, niti dostavi uredno traženu pismenu izjavu u roku određenom Članom 31. ovog Pravilnika, a svoj nedolazak ili nedostavljanje pismene izjave ne opravda u istom roku, odnosno do momenta održavanja uredno zakazane sjednice Disciplinske komisije, odluka se može donijeti i bez njegove pismene ili usmeno, pred Disciplinskom komisijom, date izjave.

Ukoliko je predkršilac odbio da delegatu KS BiH da izjavu na samom takmičenju, na kome je učinjen prekršaj, Disciplinska komisija može donijeti odluku i bez pribavljanja njegove izjave.

Član 37.

Na sjednici Disciplinske komisije, na kojoj se sprovodi disciplinski postupak, sastavlja se zapisnik.

Zapisnik treba da sadrži: mjesto, datum i vrijeme održavanja sjednice, sastav Disciplinske komisije, označenje podnosioca zahtjeva i lica, odnosno sportskog karate udruženja protiv kojih se vodi postupak, označenje prisutnih učesnika u postupku, bitnu sadržinu iskaza svih učesnika postupka, dokazno rješenje, rješenje i odluke koje su u toku postupka donijete i drugo.

Zapisnik piše zapisničar po glasnom kazivanju predsjednika Disciplinske komisije.

Tekst zapisnika se ne smije brisati i prepravljati, a precrtana mjesta moraju ostati čitljiva.

Ako neko odbije da potpiše zapisnik, konstatovaće se, ukoliko je to moguće, razlog odbijanja.

Zapisnik potpisuju: predsjednik i članovi Disciplinske komisije, zapisničar i prisutni

učesnici postupka, koji su na poziv predsjednika Disciplinske komisije na sjednici učestvovali u izvođenju dokaza.

Član 38.

Disciplinska komisija može odlučiti da se sjednica odloži kada je potrebno da se upotpuni izvođenje dokaza.

Ako Disciplinska komisija nastavi rad na novoj sjednici po istom postupku u izmijenjenom sastavu, postupak na sjednici se sprovodi čitanjem svih do tada izvedenih dokaza.

5. Izricanje mjera, donošenje, saopštavanje i dostavljanje odluke

Član 39.

Disciplinska komisija može raditi i punovažno odlučivati ukoliko je na sjednici prisutna najmanje dvotrećinska većina ukupnog broja članova komisije, s tim da sjednici prisustvuje najmanje natpolovična većina članova Komisije iz oba entitetska saveza ponaosob.

Predsjednik i članovi Disciplinske komisije ravnopravno odlučuju o odgovornosti lica, odnosno sportskog karate udruženja protiv kojih je vođen postupak.

Odluke se, u načelu, donose konsenzusom, a ako konsenzus nije moguće postići, onda se odluke donose nadpolovičnom većinom glasova od ukupnog broja članova Komisije iz oba entitetska saveza ponaosob.

Član 40.

Ako Disciplinska komisija nađe da lice, odnosno sportsko karate udruženje protiv kojih je vođen postupak nisu učinili prekršaj, ili da postoje okolnosti koje isključuju odgovornost ili da nema dokaza o učinjenom prekršaju, donijet će odluku kojom se ovo lice, odnosno sportsko karate udruženje oslobađa disciplinske odgovornosti.

Član 41.

Ako Disciplinska komisija nađe da je lice, odnosno sportsko karate udruženje, učinilo prekršaj i da je krivo za njegovo izvršenje, oglasit će odgovornim lice, odnosno sportsko karate udruženje protiv kojih je vođen postupak i donijeti odluku o izricanju odgovarajuće mjere.

Prema jednom prekršiocu u istom postupku može biti izrečena samo jedna odgovarajuća disciplinska, odnosno vaspitna mjera.

Član 42.

Pri odmjeravanju vrste i visine disciplinske ili vaspitne mjere moraju se uzeti u obzir sve olakšavajuće i otežavajuće okolnosti, a naročito: ranije kažnjavanje, težina počinjenog prekršaja i njegove posljedice, pobude iz kojih je prekršaj počinjen, sportske, moralne i lične osobine izvršioca, kao i njegovo držanje prije i poslije izvršenja prekršaja.

Ukoliko se utvrde posebne olakšavajuće okolnosti, izvršiocu može biti izrečena disciplinska mjera i ispod predviđenog minimuma, ali samo ista vrsta disciplinske mjere.

Član 43.

1. O odlučivanju o odgovornosti i izricanju mjera prema prekršiocima sastavlja se poseban zapisnik.
2. Odluka o glavnoj stvari donosi se u obliku rješenja.
3. U zapisnik se unosi samo dispozitiv odluke o izrečenoj mjeri.
4. Zapisnik potpisuje predsjednik, članovi Disciplinske komisije i zapisničar.

Član 44.

Rješenje Disciplinske komisije ima uvod, izreku, obrazloženje i pouku o pravnom lijeku. U uvod se unosi: sastav Disciplinske komisije, podnosilac zahtjeva, lice odnosno sportsko karate udruženje protiv kojih je vođen postupak i njihovi pomoćnici i zastupnici, označenje prekršaja zbog koga je vođen postupak, mjesto i dan donošenja odluke u glavnoj stvari.

Izreka sadrži odluku o oglašavanju odgovornih subjekata krivim za određeni prekršaj, zbog čega je izrečena disciplinska mjera ili odluku kojom se ovi subjekti oslobađaju odgovornosti.

Obrazloženje sadrži bitne elemente zahtjeva i izjave lica protiv koga je vođen postupak, odnosno predstavnika sportskog karate udruženja protiv koje je vođen postupak, ocjenu izvedenih dokaza, utvrđeno činjenično stanje i okolnosti koje su uticale na stepen odgovornosti i visinu izrečene disciplinske mjere.

Pouka o pravnom lijeku ukazuje na subjekte koji mogu, u kojem roku i kome da izjave žalbu na izrečenu odluku.

Rješenje potpisuje predsjednik Disciplinske komisije.

Član 45.

Ovjereni prepis rješenja Disciplinske komisije dostavlja se putem pošte sa povratnicom:

1. Podnosiocu zahtjeva,
2. Licu, odnosno sportskom karate udruženju protiv kojeg je vođen postupak,
3. Karate savezu Bosne i Hercegovine,
4. Sportskom karate udruženju čiji je prekršioc član.

Član 46.

Disciplinska komisija sve svoje odluke unosi u disciplinski registar. Svaka konačna odluka kojom je izrečena disciplinska ili vaspitna mjera članovima KS BiH, sportistima, stručnim i sportskim radnicima, trenerima, sudijama, delegatima, selektorima-trenerima i ispitivačima, unosi se u takmičarsku knjižicu, odnosno u odgovarajući dokument stručnih lica.

Odluka Disciplinske komisije može se objaviti i u sredstvima javnog informisanja.

B) POSTUPAK PO ŽALBI (DRUGOSTEPENI I TREĆESTEPENI)

6. Postupak po žalbi na odluku prvostepenog organa

Član 47.

Protiv odluke Disciplinske komisije KS BiH mogu, u roku od osam dana od dana prijema rješenja, izjaviti žalbu UO KS BiH, kao drugostepenom organu, podnosilac zahtjeva i lice, odnosno sportsko karate udruženje, protiv kojih je vođen postupak.

Žalba ne zadržava izvršenje izrečene mjere.

Ako u roku od osam dana ovlaštena lica ne podnesu žalbu, odluka Disciplinske komisije je konačna.

Drugostepeni organ je dužan da žalbu na oslobađajuću ili osuđujuću odluku Disciplinske komisije riješiti u roku od trideset dana od dana prijema žalbe potvrđivanjem, preinačivanjem ili ukidanjem prvostepene odluke.

Član 48.

Neblagovremeno podnijete žalbe i/ili podnijete od neovlaštenih lica se odbacuju.

Član 49.

UO KS BiH razmatra žalbu na taj način što se prethodno informiše o predmetu i toku postupka pred Disciplinskom komisijom, o sadržini objave odluke i razlozima prigovora, a potom se raspravlja i odlučuje o njegovoj osnovanosti.

Podnosilac žalbe ima pravo prisustvovanja sjednici UO kao i drugi učesnik postupka, koji se mora uredno obavijestiti o podnijetoj žalbi, a oba učesnika u postupku o mjestu, datumu i vremenu održavanja sjednice UO na kojoj će ova biti razmatrana.

7. Postupak po žalbi na odluku drugostepenog organa

Član 50.

Odluka UO KS BiH nije konačna.

Protiv ove odluke pravo žalbe Sportskoj arbitraži, u roku od trideset dana od dana prijema iste, imaju lica i sportska karate udruženja protiv kojih je izrečena disciplinska mjera.

Član 51.

Sportska arbitraža, odluku po žalbi iz prethodnog člana, donosi jednoglasno, konsenzusom. Odluka Sportske arbitraže je konačna, osim u slučaju kada nije u skladu ili je u suprotnosti sa opštim aktima KS BiH.

Protiv ovakve odluke Sportske arbitraže, pravo žalbe Skupštini KS BiH, u roku od trideset dana od dana prijema iste, imaju lica i sportska karate udruženja protiv kojih je izrečena disciplinska mjera.

C) PONAVLJANJE POSTUPKA

Član 52.

Postupak koji je završen konačnom odlukom Disciplinske komisije ili organa KS BiH može se ponoviti na prijedlog podnosioca zahtjeva kojim je pokrenut postupak ili lica

odnosno sportskog karate udruženja protiv kojih je postupak vođen pod sljedećim uvjetima:

1. ako je odluka zasnovana na lažnim dokaznim sredstvima ili
2. ako je podnosiocu zahtjeva za pokretanje disciplinskog postupka, licu, organu, odnosno sportskom karate udruženju protiv kojih je vođen postupak uskraćeno, protivno odredbama ovog Pravilnika, učešće u postupku ili
3. ako postoje činjenice i dokazi koji bi bili od presudnog uticaja na odluku, a koje subjekti, koji mogu tražiti ponavljanje, nisu znali u vrijeme donošenja odluke.

Prijedlog za ponavljanje postupka podnosi se Disciplinskoj komisiji KS BiH u roku od četrdeset pet dana od dana saznanja za razloge ponavljanja.

Ako Disciplinska komisija KS BiH odbije prijedlog, može se izjaviti žalba UO KS BiH, kao drugostepenom organu, a nakon njega drugim organima Saveza, kako je navedeno u članovima 50. i 51. Prijedlog za ponavljanje postupka ne zadržava izvršenje odluke.

ZASTARJELOST

a) Zastarjelost pokretanja postupka

Član 53.

Disciplinski postupak se ne može pokrenuti po isteku roka od godinu dana od dana izvršenja prekršaja, odnosno saznanja za prekršaj.

Zastarjelost se prekida podnošenjem zahtjeva za pokretanje disciplinskog postupka ili aktom Disciplinske komisije.

b) Zastarjelost izvršenja odluke

Član 54.

Izrečena mjera disciplinskog organa može se izvršiti u roku od godinu dana od dana kada je postala izvršna. Po isteku ovog roka izrečena mjera disciplinskog organa se ne može izvršiti.

IZVRŠNOST I KONAČNOST DONIJETE ODLUKE

a) Izvršnost

Član 55.

Odluka Disciplinske komisije i organa KS BiH izvršna je danom konačnosti iste.

b) Konačnost

Član 56.

Ako u propisanom roku ne bude podnijeta žalba na odluku Disciplinske komisije i organa KS BiH, ista je konačna danom isteka roka u kome je žalba mogla biti podnijeta.

VII PRELAZNE I ZAVRŠNE ODREDBE

Član 57.

Ovaj pravilnik usvojen je na sjednici UO KS BiH, održanoj u 09.06.2020. godine, dana i stupa na snagu osmog dana od dana donošenja.
Stupanjem na snagu ovog Pravilnika prestaje važenje Disciplinskog pravilnika od 10.07.2014. godine.

Član 58.

Postupci koji se vode po ranije važećem i gore navedenom Disciplinskom pravilniku, okončaće se stupanjem na snagu ovog Pravilnika, po odredbama ovog Pravilnika.

Član 59.

Izmjene i dopune ovog Pravilnika vrše se na način i po postupku za njegovo donošenje.

Član 60.

Autentična tumačenja odredaba ovog Pravilnika daje UO KS BiH.

Broj: UO-10-02/20
Sarajevo, 08.10.2020. godine

PREDSJEDNIK KS BiH

Miroljub Kremenović

